

中國地方志集成



雲南府縣志輯 ⑤3

民國石屏縣志(三)

鳳凰出版社 ● 上海書店 ● 巴蜀書社

民國石屏縣志(三)

袁嘉穀
纂修



石屏縣志卷三十二

藝文附錄十三 敘記

脩學記

編修 周洪謨

學校所以明人倫也人物之在天下者同故學校在天下亦同書不云乎惟皇上帝降衷下民若有恆性克綏厥猷惟后夫曰衷曰性人皆有之雖遐荒絕域風殊俗異而其稟天地之氣以有生者莫不具是衷懷是性而著於君臣父子夫婦長幼朋友之間此人倫之所以同也然人倫雖同氣稟或異是以有味於理而懷之者於是人君相上帝而教下民自畿甸以及邊徼郡縣莫不建學明倫使人人各得其當然之道此學校之所以同也雲南距京師幾萬里石屏一州又在南數百里其學創於至正間元末頽廢國朝洪武二十二年始建廟

學歲久滋敝正統五年今監察御史王公驥時爲是州學正捐俸率衆修大成殿及東西廡後四年偕臨安府通判彭善道修明倫堂及居仁由義二齋偉然壯麗適成有甘露降堂前叢竹間浹旬人以爲瑞應明年建文昌祠於學巽隅又明年偕知州顧震葺櫺星門旣華而則雖內地郡縣所置鮮與之比又明年偕署州李華重構義門及廨舍而公以秩滿去辛未秋知州任彬偕署學正王紹宗覲大成殿址飾夫子像并塑四配十哲後三年公旣爲御史奉勅往雲南清刑旣至是州表其坊爲儒林坊且陶甓以畢堂廡街路之未備者旣而訓導黃思義歷序諸君子迭新廟學之績以遺余求識之石庶後之來官茲土者有所繼與

石屏州修路碑記

知府薛昌

成化戊戌承乏臨安石屏州昌明里寇肆剽掠檄上當
道議方岳重臣各一員統兵征剿予率土兵經寶秀鐵
冶所駐兵黃草壩秋七月不抵州而凱旋冬十二月巡
歷於州至瓦屋鋪南異龍湖北玉峯山崎嶇曲徑巉巖
恠石畏馬蹶徒行至州幾二十里似此最顯處約五里
經行甚艱余乘小舟而往回亦如之嘆曰天下之事本
易理私焉則底於難公厥心以事其事則事何有如此
道不賢者廢之必待賢者以興也不三四稔州守與督
郵接踵去官予賢屬邑知通海李本成化辛丑冬委署
州事慨然曰玉峯山道當州要衝修不可緩也謀於衆
僉曰石徑工未可期本曰工力既加功焉弗成經營量
度轉巨石撲大木焚以炎火沃以冽泉摧其堅剛化爲
灰燼畚鍤之下易朽壤去白礫乃闢乃墾乃宣乃理隨

山之曲直順地之高下非恃刑驅勢逼工人之子來者
莫不曰賢哉尹也署我州肯開我塗貧者效力富者輸
財春正月興工三月告成修若干里州之士庶相率請
記予異昔焉覩其廢而發嘆今焉樂其成而爲記豈偶
然哉亦有數耳竊嘗聞賢莫大於成功不賢莫大於廢
事賢者之作也不思成功以利人利世而利己與不賢
何殊用賢棄不賢古今之通理本其賢而知職矣記成
勒諸石從事有官君子董役之人列於碑陰云

石屏州水利記

參政陳宣
平陽人

水生於天一成於地六非得人以理之則縱其汜濫瀾
漫以魚鼈吾生民此禹所以憂溺之心三過其門而不
入也周公營洛之時又營鑿石渠引伊洛水以灌田土
號周陽渠至漢張純猶復其故道至於今不廢豈終能

爲患而不爲利耶易曰潤萬物者莫潤乎水然或止於坎窞蓄於池於湖於澤性雖潤物終莫能自行不幸而生於四塞之地又不幸遭時大旱其不爲枯槁而凋喪者幾希矣欲潤物莫能自致不能不假之人力焉人也者所以補天地之不及而所謂參贊焉者於斯亦有驗與猶之有一物之仁有一事之仁謂之非仁不可也滇南屬郡臨安予與憲副包公好問實守巡其地皆有責焉弘治癸亥自春徂夏五月望尚不雨春秋所必書屏人心驚惶走告無虛日聞有言去城之西不五十里有石屏湖俗重之曰海若假人開濬水可下行性能潤其枯槁湖落地出盡膏腴也憲副王公行之邀我二人望三日偕至湖作謀治式如金如玉凡百千丈有奇今衛知府王公資良指揮龐君松民兵共役令之稱畚鍤具

餽糧程土物明日卽事每丈平處一人至二人有沙土處倍之凡一千五百人每五十丈督一百戶每百五十丈督一千戶每五百丈督一指揮通判等官察其勤惰以上下其食事三旬而成水通物潤且有地以鄉計者四以畝計者數百萬過此則潤及建水州猶未已也天之生水與地成之而人之所以贊之者至是皆無遺憾矣不然則豬於坎窞湖澤與土石相汨沒卒歸之無用之所而已矣畏天命憫人窮周公當先爲之豈欺我哉南京監察御史王君明仲讀書於家感而有請且曰吾徒生長於斯聞有湖在石屏未嘗聞有利如此不刻之石何以垂遠而傳不朽包公偕予走書白當道當道然之以爲民事所當急者又重吾子之請敬從之遂記其事

重修學記

給事中 閻 閔
山東人

國家得雲南爲後俗馴者置府州縣選流官蒞之開儒學以教鄉俊建文廟而祀吾夫子者十之四蠻夷之習雖未盡殄禮文之風亦間興焉荒服之制也洪惟太祖高皇帝神明絕倫知地險道遠土人黠黷叛服靡有恆心詔徙周齊魯宋秦吳楚大姓留進征將佐材武之良部拒趨健之衆家焉以控錯而漸之今衣冠科目之望多北來者用夏變夷之訓實於是虛章矣臨安雖雲南南邊而人物頗秀慧文教易行故州縣屬者廟學爲多石屏州自洪武中已剏有之正統景泰之間皆相因修治不廢比於嘉靖則歲久而圯敝者且遇半矣豐城甘公珂來知州事以其俸入爲倡置牛酒延州之耆民願財力効者入役役始二年秋七月旣冬十有一二月役皆

畢凡殿廡堂齋及諸臺閼垣墻術阨欹者扶正究加飾焉圯者改貫而□之又新作神廚以肅祀事築射圃以肆禮容而廟學之制井如也凡州之人士喜甘公之善營度無需於公無重累於邊氓而文教之地久大其興以許吏目同仁余山東人也俾來求記而重之以知臨安府事貴溪汪先生之言則爲語以貽之曰凡業於學必爲位以釋奠於先師古之道也自唐罷周公而登孔子廟貌學宮遍天下四書五經之教人家知之夫業以學專其習也祀以孔子表其趨也唐虞之養士而用之數奏以明其試車服以陟其庸而洙泗之誘人以入善也博之以學文約之以復禮考言行也故曰言行者君子之所以動天地則先師之所以垂訓朝廷列學官而教之者不遠人也州太守率諸生升堂而問業拜夫子

之遺像而仰思之將無慎乎故曰言忠信行篤敬蠻貊之邦行矣善學孔氏者安可以地限而不自求之身乎夫舜文之生雖東西夷而天下之言聖者莫能加陳良楚產也以悅周公仲尼之道名行不復擬於南蠻且南交義叔所宅尚書實首載之則石屏固禹服所經今之人士亦堯舜直道而行之民又沐聖明百五十年之化誦我夫子忠信篤敬之文熟且多矣安知不有豪傑之士夫立功立言名起南服者哉嗚呼凡我大夫士祀於廟肄於學其尚慎諸言行斯可矣而顧自限以遠不以惑乎乃若今茲工費之數趨成名氏之多甘氏許氏當自有籍記之不附書

改州門方向記

知州李時芳

州前列肆夾居士民環拱橫自儒學而迤於西縱自州

門錯東而抵於南予丙辰冬季月念一日奉簡命歷萬里來牧茲郡是日下車見其門之向不與開道合曰何其地道之不章如是也是非堪輿家惑於衝激乎改向之意戚戚然動矣但州事未諳民情未得不敢先圖將期遂審山水之向背而後知果宜於改也州治四圍皆山而乾陽山枕於後面陽皆水而異龍湖抱於前其址盡石平如砥而周包十里是平中一突而生氣湧如也面南一山獨立爲案不與諸山伍俗呼爲帽盒以其形也州門之向舍帽盒之案舍開道之明堂子午之正向而西可乎異龍之水抱於前內有墩臺號曰三島卽三台星左有乾陽山一帶迤東至萊玉內一支奔放如渴龍就飲是青龍之長而遠也右有鍾秀山峙於西昂然如虎踞是白虎之近而稜也面拱三台左迎青龍右避

白虎向合明堂而子午也地道貴理不如此地道其不明矣乎遂命臬人樹影子午之向得焉大門三間舊有樓今改如向儀門亦如之及建樓三間亦如之正廳有俟焉若夫椽石工匠之費不及里甲亦不敢請官糧於聽訟東矢鉤金中遵律令量取之不敢肆科罰也越丁巳歲九月起工十月落成於國事當書遂書之

學田記

參議
邑人楊廷相

嘗謂三代學校井田之法相須並行故人咸有世業以興於行此明君制恆產以固恆心卽先王旣富方穀之意也明興稽古定制遠軼前代籍官民以授田設學校以養士講習有所廩祿有儲育士作人之意亦旣渥矣顧制有定額而衆且貧者不與則夫推廣德意嘉惠人文增益於常制之外以周貧士在良有司矣石屏隸臨

安鉅郡西蜀金侯來守是州首詢民隱政先黌序暮年
政通人和暇日進師儒而告之曰海內名庠多置學田
以資士類石屏獨無是予之責也願爲二三子圖之爰
稽帑積以備若值會彭生時舉家饒而孤爲親黨構訟
相侵所有彭以金二百五十兩獻州用助公費侯嘉其
義白其事於先督學程公允議益以庫餘共三百金置
寶秀葉家莊計田若干畝歲入租若干石暨義民梅
鳳王民阜樂捐田三處皆爲學田仍遣屬吏詣勘立券
紀籍於官以防侵沒屏學有田乃自侯始夫屏自建學
以來聯之以師儒給之以餼廩優之以丁糧授之以筆
札養士非不周且厚也但士貧爲常率牽內顧非有學
田以資給何以曲成而示勸故田租之惠主於贍貧惟
士之尤貧而勵行爲首給喪不能舉者次之不能娶者

又次之服食不充者量周之若夫禮賢勸學大比應試者給卷值應貢上京者益途費歲終粟餘佐彼膏油此頒給之大較俟臨時而酌議之至於出納悉宰於有司公議於學校覈實於郡守請於當道而後行務俾以時給助士霑實惠益得以肆力於學矣雖然志士不可以困窮而隳節上人不可以無士而廢養故先養而後教者上之所以待士先事而後食者士之所當自勵也今屏學有田士有養蒙其惠而思其義爭自淬勵爲士類先庶處則爲良士出則爲良臣仰副上人作養之至意多士勉之若徒急口腹碌碌無所樹立與虛出納肆侵漁視此田爲利壑誠有餘愧固非上之所望以待士士之所望以自待亦非予之所敢知也豈設田之初意哉事竣今督學陳公式嚴教約清理學田樂嘉厥成暨州

侯譚公適至新政方銳學正劉君謨訓導李君倬及庠士謂事關學政不可無紀欲勒貞珉以垂永久乃徵文於予予因述置田興學交望相成之意以告來哲繼此守官君子興起而增益之又屏士之幸也程公名大賓徽州婺源人丙辰進士陳公名洙福州長樂人壬戌進士金侯名鑑叙州富順人丙午鄉進士今晉臨安郡丞在屏省里役清糧徭繕城靖寇善政別有紀者予可略之若學田尤其顯著者其地畝界至稅糧租額價值與頒給之數悉刻於碑陰

石屏寶秀屯倉政記

太僕
邑人塗時相

今天下自祖宗創首以來聖聖相承二百餘禩方輿以內隨在開設郡縣建衛置屯蓋文武並用兵食相須久安長治之道也臨安爲滇南重鎮石屏據臨安上游其